

Na osnovu člana 17. Zakona o Vijeću ministara Bosne i Hercegovine ("Službeni glasnik BiH", br. 30/03, 42/03, 81/06, 76/07, 81/07, 94/07 i 24/08) i člana 5. Odluke o dozvolama za Univerzalne mobilne telekomunikacijske sisteme ("Službeni glasnik BiH", broj 21/09), na prijedlog Ministarstva komunikacija i prometa Bosne i Hercegovine, Vijeće ministara Bosne i Hercegovine na 120. sjednici, održanoj 29. aprila 2010. godine, donijelo je

ODLUKU

O NAČINU RASPODJELE SREDSTAVA UPLAĆENIH NA IME DODIJELJENE DOZVOLE ZA UNIVERZALNE MOBILNE TELEKOMUNIKACIJSKE SISTEME

Član 1.
(Predmet Odluke)

Ovom Odlukom utvrđuje se način raspodjele sredstava uplaćenih na ime dodijeljene dozvole za Univerzalne mobilne telekomunikacijske sisteme, u skladu sa Odlukom o dozvolama za Univerzalne mobilne telekomunikacijske sisteme ("Službeni glasnik BiH", broj 21/09) (u daljnjem tekstu: Odluka o UMTS).

Član 2.
(Namjena sredstava)

- (1) Finansijska sredstva iz člana 1. ove Odluke u iznosu od 15% usmjeravaju se za razvoj sektora telekomunikacija, a namjenu će posebnom odlukom utvrditi Vijeće ministara Bosne i Hercegovine, na prijedlog Ministarstva komunikacija i prometa Bosne i Hercegovine.
- (2) Finansijska sredstva iz člana 1. ove Odluke u iznosu od 85% usmjeravaju se za finansiranje pripreme i izgradnje putne infrastrukture, kako slijedi:
 - a) za izradu projektne dokumentacije, nadzor i izgradnju međudržavnog mosta Gradiška, na autoputu Banja Luka - Gradiška Okučani, u visini cca 12.000.000,00 do 14.000.000,00 eura, u protuvrijednosti konvertibilne marke prema srednjem kursu Centralne banke Bosne i Hercegovine na dan plaćanja;
 - b) za izgradnju i nadzor međudržavnog mosta Svilaj, na autoputu na Koridoru Vc, u visini cca 16.000.000,00 do 18.000.000,00 eura, u protuvrijednosti konvertibilne marke prema srednjem kursu Centralne banke Bosne i Hercegovine, na dan plaćanja;
 - c) za izradu planersko-studijske dokumentacije za jadransko-jonski autoput, na dijelu kroz Bosnu i Hercegovinu (Počitelj - Neum - Trebinje - granica sa Crnom Gorom), u visini cca 2.000.000,00 do 2.500.000,00 eura, u protuvrijednosti konvertibilne marke prema srednjem kursu Centralne banke Bosne i Hercegovine na dan plaćanja;
 - d) za izradu planersko-studijske dokumentacije za međudržavni most Brčko, u visini cca 500.000,00 do 600.000,00 eura, u protuvrijednosti

konvertibilne marke prema srednjem kursu Centralne banke Bosne i Hercegovine na dan plaćanja i

e) udio u finansiranju pripreme i izgradnje graničnih prijelaza na autoputu Banja Luka - Gradiška i dva granična prijelaza na autoputu na Koridoru Vc, ukoliko se sredstva za ove namjene ne osiguraju iz drugih fondova, u visini cca 5.000.000,00 do 6.000.000,00 eura, u protuvrijednosti konvertibilne marke prema srednjem kursu Centralne banke Bosne i Hercegovine na dan plaćanja.

(3) Prioritet upotrebe sredstava iz stava (2) ovog člana daje se izgradnji međudržavnih mostova Gradiška i Svilaj, zavisno od pripremljenosti projektne dokumentacije i osiguranja potrebnih saglasnosti i dozvola za izgradnju.

Član 3.

(Način uplate i saglasnost za korištenje sredstava)

(1) Uplatu finansijskih sredstva iz člana 1. ove Odluke operateri vrše na namjenski račun otvoren u okviru sistema Jedinственог računa trezora Bosne i Hercegovine, prema instrukciji Ministarstva finansija i trezora Bosne i Hercegovine.

(2) Saglasnost za korištenje uplaćenih finansijskih sredstava daju Ministarstvo komunikacija i prometa Bosne i Hercegovine i Ministarstvo finansija i trezora Bosne i Hercegovine, uzimajući u obzir realni godišnji iznos potrebnih sredstava i dinamiku korištenja sredstava.

Član 4.

(Reguliranje prava i obaveza)

(1) Odnosi između Vijeća ministara Bosne i Hercegovine i ovlaštenih operatera iz člana 2. stav (1) Odluke o UMTS-u uređuju se posebnim ugovorom.

(2) Ugovore iz stava (1) ovog člana priprema Ministarstvo finansija i trezora Bosne i Hercegovine i Regulatorna agencija za komunikacije Bosne i Hercegovine.

Član 5.

(Realizacija Odluke)

Za realizaciju ove Odluke zadužuju se Ministarstvo komunikacija i prometa Bosne i Hercegovine i Ministarstvo finansija i trezora Bosne i Hercegovine.

Član 6.

(Stupanje na snagu)

Ova Odluka stupa na snagu danom donošenja i objavljuje se u "Službenom glasniku BiH".

VM broj 124/10
29. aprila 2010. godine
Sarajevo

Predsjedavajući
Vijeća ministara BiH
Dr. **Nikola Špirić**, s. r.